

續
文
獻
通
考

續文獻通考卷之一百三十三

皇明進士雲間王圻纂輯

王禮考 山陵 陵祭

宋

寧宗開禧三年成肅皇后夏氏崩殯于永阜陵正北時吏部尚書陸峻言伏覲列聖在御前有諸后上仙緣無山陵可祔是致別葬若上仙在山陵已卜之後無有不從葬者其他諸后葬在山陵之前神靈既安並不遷祔惟元德章懿二后方其葬時名位未正續行追冊其成穆皇后孝宗登極卽行追冊改殯所爲櫛宮典禮已備與元德章懿事體不同所以更不遷祔竊稽前件典禮祇

緣喪有前後勢所當然其於禮意却無隆殺今來從葬
阜陵爲合典故從之 嘉定十七年帝崩謚冲聖嗣孝
皇帝已改謚仁文哲武恭孝皇帝葬永茂陵

理宗寶慶元年二月辛酉仁文哲武恭孝皇帝靈駕發引
皇太后行奉寧奉辭禮皇帝行啓奠祖奠禮奉辭皇城
門外行遣奠禮百寮辭于郊外 癸酉永茂陵掩攢

三年八月詔寧宗仁文哲武恭孝皇帝謚號見今六字
宜加上十字爲十六字如祖宗故事令宰執侍從臺諫
兩省官禮官集議仍令禮官詳具典禮以聞 九月史
彌遠等集議加上徽號曰法天儔道純德茂功仁文哲
武聖曆恭孝皇帝詔依議 紹定五年詔大行皇太后

陵寢當遵遺詔務從儉約諸路監司州府軍監寺止進
慰表其餘免進仍不得以助修奉攢宮爲名有所貢獻
六年宰臣等恭上皇太后尊諡曰恭聖仁烈皇后詔
依右正言何琮奏皇太后山陵用度盡出官中猶恐州
縣並緣動擾百姓乞飭有司通行曉諭嚴加禁止從之
度宗咸淳元年謚大行皇帝曰烈文仁武安孝皇帝廟號
理宗三月葬于永福陵

恭帝德祐元年正月葬度宗于永紹陵

端宗移師香山暫宮於馬南寶家后全氏崩葬梅花水坡
上其後帝崩于舟中葬壽星塘今莫知眞陵所在史載
端宗葬于崖山此廣東瀕海地也號永福陵

右宋諸陵在紹興錢塘者一百一所元西僧楊璉真加貪其寶物一朝盡發徽宗陵無骸骨惟一鐵燈檠而已孟后髮長八尺餘有得之者崇奉祠堂大獲福祚理宗頂至截爲飲器又欲以牛馬骨和諸陵骨築浮圖葬之有義士林景熙唐珏潛移瘞蘭亭山後始免嗟乎其酷至矣詳見忠節考義士傳

遼

太祖崩於天顯元年七月九日梓宮至皇都權殯於子城西北二年八月葬于祖陵置祖州天城軍節度使奉陵寢

太宗五年四月會同人皇王來朝詔先赴祖陵 八年宣

簡太皇太后崩九年二月葬德陵前二日發喪于葢塗殿太宗具哀服以送建碑于陵殿 大同元年八月太宗皇帝崩于藻城九月葬鳳山陵曰懷陵 太宗之世謁陵者四

世宗天祿五年九月以弑崩應曆元年葬顯州西山陵曰顯陵

穆宗應曆五年六月應天皇后崩十月命太師唐骨德治園陵十一月葬于祖陵 十九年三月穆宗以弑崩葬懷陵 穆宗之世謁陵者四

景宗保寧十年正月祭顯陵 乾亨四年九月景宗次焦山崩十二月奉大行梓宮于葢塗殿

聖宗統和元年正月內外臣僚命婦並進助山陵費二月
葬于乾陵時勃海撓馬解里以先帝厚恩乞殉葬詔不
許賜物以旌以近侍卽掌飲伶人撓魯爲殉上與皇太
后因爲書附土大行皇帝又詣陵置奠命繪近臣于御
容殿賜山陵工人物有差 四月辛丑謁三陵以東京
所進物分賜陵寢官吏壬寅致享于凝神殿癸卯謁乾
陵 八月己丑謁祖陵癸巳與皇太后謁懷陵九月十
一月如之 是月又遣使奠熊肪鹿脯于乾陵之凝神
殿 十二月謁凝神殿遣使分祭諸陵 三年八月謁
乾陵者再命南正面臣僚分檢山陵林木命邢抱朴勾
檢顯陵 皇太后謁顯陵 十五年以後謁顯陵者五

謁乾陵者四致奠於祖懷二陵者二

顯宗景福元年九月躬視慶陵 十一月甲午葬慶陵丙

申謁慶陵以遺物賜羣臣名其山曰慶雲殿曰望仙

重熙七年十二月命日進酒于大安宮致薦慶陵 八

年七月謁慶陵致奠于望仙殿迎皇太后至顯州謁園

陵 十二年九月謁望仙殿旋謁懷陵 十九年六月

謁慶陵明年如之又謁懷陵 二十一年謁祖乾二陵

二十三年六月謁慶陵 二十四年八月帝崩于南

崖北峪行宮十一月葬于慶陵宋及高麗遣使來會

道宗時謁慶陵者十二謁祖乾二陵者二謁懷陵者一

清寧三年太皇太后崩葬慶陵 壽隆七年正月帝崩

于混同江行宮 六月葬帝及宣懿 皇后于慶陵

天祚帝時三謁慶陵三謁乾陵一謁度陵 天祚没于金

不知歲月金皇統五年葬于廣寧府間陽縣乾陵之旁

孟冬朔拜靈儀 有司設酒饌于山陵皇帝皇后駕至

敵烈麻都奏儀辦闌門使贊皇帝皇后詣位四拜皇帝

皇后率羣臣命婦循諸陵各三匝還宮翼日羣臣入謝

將塋上謚冊禮 先一日於叢塗殿西廊設御幄并

臣僚幕次大樂令展宮懸於殿庭協律郎設舉麾位至

日北南面臣僚昧爽赴叢塗殿先置冊寶案于西廊下

閣使引皇帝至御幄服寬衣皂帶臣僚班齊分班引入

饗殿合班立定引冊案上殿至褥位寶案次之設于西

階閣使引皇帝自西階升殿初行樂作至位立樂止宣
徹使提皇帝勒躬再拜陪拜者皆再拜翰林使執莖盞
以進皇帝再拜引至神座前跪奠三樂作進奠訖復位
樂止又再拜陪拜者皆再拜引皇帝于神座前北而立
捧冊函者各進前跪冊案退置殿西壁下引讀者進
前俯伏跪讀通全銜臣讀謚冊讀訖僚伏興復位捧冊
函者置于案上捧寶函者進前跪讀寶官通銜跪讀訖
引皇帝至褥位再拜陪位者皆再拜禮畢引皇帝歸御
幄初行樂作至御幄樂止引臣僚分班出若皇太后奠
酒依常儀

聖聖宗禮

聖宗崩與宗哭奠于鼓塗殿大行之夕四

鼓終皇帝率羣臣入樞前三致奠奉柩出殿之西北門就輜輶車藉以素茵巫者拔除之詔且發引至塋所凡五致奠太巫祈禳皇族外戚大臣諸京官以次致祭乃以衣弓矢鞍勒圖畫馬馳儀衛等物皆燎之至山陵葬畢上哀冊皇帝御幄命改火而火致奠三拜又東向再拜天地訖乘馬率送塋者過神門之木乃下東向又再拜翼日詰早率羣臣命嬪諸山陵行初奠之禮升御座殿受遺賜又翼日再奠如初

塋道宗禮 道宗崩天祚于小殮翼日遣北院樞密副使林牙以所賻器物置之幽宮靈柩升車親王推之至食殯之次蓋遼國舊俗于此刑殺羊以祭皇族外戚諸

京州官以次致祭至塋所靈柩降車就舉皇帝免喪服
步引致長福岡是夕皇帝入陵寢授遺物于皇族外戚
及諸大臣乃出命以先帝寢帷過于陵前神門之木帝
不親往遣近侍冠服赴之初奠皇帝皇后率皇族外戚
使相節度使夫人以上命嬪皆拜祭循陵三匝而降再
奠如初辭陵而還

金

金世諸藏皇統四年皆追稱陵號始祖曰光陵德帝曰
熙陵安帝曰建陵獻祖曰輝陵昭祖曰安陵景祖曰定
陵世祖曰永陵肅宗曰恭陵穆宗曰獻陵康宗曰喬陵
太宗天會元年九月塋太祖于宮城西南寧神殿至十三

年改葬於和陵

十三年三月

時熙宗即位

葬太宗于和陵

十四年正月太皇太后紇石烈氏崩二月合葬太祖

陵

熙宗皇統三年三月太后唐括氏崩八月合葬太宗陵

四年改太祖和陵曰睿陵太宗和陵曰恭陵

海陵天德四年朝謁世祖太祖太宗德宗陵 貞元三年

三月命以大房山雲峯寺爲山陵建行宮於其麓宮成

名曰盤寧五月命判太宗正寺京等如上京奉還太祖

太宗梓宮兩遣使迎祭後復親迎致奠于東郊舉哀已

卯梓宮至中都以大安殿爲丕承殿安置命省部諸司

使服治事不奏死刑一月至十一月梓宮發丕承殿山

陵禮成並仍舊號 初熙宗被弑海陵降爲東昏王塋
于皇后裴滿氏墓中至是亦改塋大房山蓼香甸諸王
同兆域大定初追謚閔宗陵曰思陵別立廟 十九年
升祔太廟增謚 二十八年以思陵狹小改塋峨眉谷
仍號思陵 正隆元年七月命太保昂如上京奉遷始
祖以梓宮 十月乙酉塋始祖以下十帝于大房山閏
二月己亥山陵禮成 是年至五年兩謁山陵 六年海
陵遇弑都督府以其柩置之南京班荆館至大定二年
塋于大房山鹿門谷諸王兆域二十年有司言其罪降
爲庶人改塋山陵西南四十里

世宗大定二年正月如大房山享獻山陵 三年八月如

大房山薦享于睿陵 九月改葬睿宗皇帝遷梓宮於
盤寧宮十月如山陵謁睿宗皇帝哭盡哀 四年正月
以獵得頭鶯遣使薦山陵自是歲以爲常 八月如大
房山致祭于山陵 七年八月如大房山致祭于睿陵
八年十月命涿州刺史兼提督山陵每以朔望致祭朔
則用素望則用肉以明年正月爲始仍命圖畫功臣于
陵廟其未立碑者立之 二十一年二月上如春水元
妃李氏以疾薨詔御史中丞張九思提控殯事少府監
左光慶大興少尹王脩典領鹵簿儀仗宮籍監別治殯
所還殯京師乙未入自崇智門百官郊迎親戚迎奠道
路殯于興德宮西位別室庚子上至京師幸興德宮致

奠北塋三致奠馬詔平章政事烏古論元忠監護塋事
癸未啓皇上輟朝皇太子親王宗室百官送塋甲申葬
于海王莊丙戌上如海王莊燒飯二十八年九月與賢
妃石抹氏德妃徒單氏柔妃大氏俱陪塋于坤厚陵
二十九年正月世宗崩皇太孫卽位殯于大安殿三月
上尊謚四月塋興陵 八月謁奠諸陵 九月增守山
陵爲二十丁給地十頃

章宗明昌四年九月如山陵致奠 泰和二年十月以封
皇子報謝于山陵

衛紹王大安元年正月上章宗尊謚二月塋道陵 九月

如大房山謁奠虞陵裕陵道陵

衛紹王被弑降封不知塋所

哀宗正大元年三月戊申奉安宣宗銜容于孝嚴寺癸丑
葬德陵十二月宣宗小祥燒飯于德陵 八年九月慈
聖宮皇太后唐括氏崩遺詔園陵制度務從儉約十二
月聖明惠皇后夫興元年四月明惠皇后陵被發失柩
所在遣中官徃視之及元師許和始得以興衛宮女七
人出迎朔門奉柩至城下設御帳安置是夜復葬之
哀宗爲元兵所逼自焚于蔡州幽蘭軒奉御絳山收遺
骨瘞之汝水上

徽宗皇帝天會二年薨熙宗追上尊謚改葬興陵

睿宗皇帝天會十三年薨世宗追上尊謚改葬大房山號
景陵

顯宗皇帝大定二十五年薨殯于南園熙春殿章宗卽位
追上尊謚陵曰裕陵

金人葬禮無考其上謚冊儀多因唐宋之舊然後世追
謚者皆用吉禮不錄

元世七主皆葬起輦谷從諸帝陵

略見國
輿下

皇明

熙宗陵在今鳳陽府泗州蠓城之北基運山洪武初上尊
號曰祖陵設泗州祠祭署奉祀一員以朱氏世官朱
本宗人壻也又于基運山望祭

德祖 懿祖二陵置陵戶二百九十三戶供酒掃每歲
長至正旦用太牢三清明中无毒及每月朔望用少

牢三本署官供祭行禮

仁祖陵在中都鳳陽府太平鄉洪武初上尊號曰英陵
復復稱皇陵設皇陵衛并祠祭署署官奉祀一員
祀丞三員以汪文爲署令劉英爲署丞專典祀事二人
皆上故里人也故命世襲置陵戶三千三百四
十二戶供直宿灑掃於內選禮生二十四人供祭祀執
事每歲長至正旦用太牢清明中元孟冬用少牢俱署
官行禮朔望中都留守司官行禮弘治元年以來差內
官一員奉勅監護凡官員以公事經過者俱謁陵
太祖高皇帝陵曰孝陵在南京鍾山之陽高帝后馬
氏合塋設神宮監并孝陵衛及祠祭署每歲正旦孟

冬忌辰 萬壽聖節俱行香清明中元冬至俱祭祀特
令勲舊大臣一員行禮南京各衙門文武官俱陪行禮
若 親王之國過南京者謁 陵官員以公事入城者
謁 陵出城者辭 陵 國有大事則遣官大臣祭告
太宗文皇帝陵曰 長陵在京師昌平縣之 天壽山
文皇后徐氏合塋

仁宗昭皇帝陵曰 獻陵在天壽山 昭皇后張氏合塋
宣宗章皇帝陵曰 景陵在天壽山 章皇后孫氏合塋
英宗睿皇帝陵曰 裕陵在天壽山 睿皇后錢氏合塋
憲宗純皇帝陵曰 茂陵在天壽山 孝穆皇后紀氏合
塋

孝宗敬皇帝陵曰 泰陵在天壽山

武宗殷皇帝陵曰 康陵在天 山 孝靖皇后夏氏合

塋

世宗肅皇帝陵曰 永陵在天壽山 孝烈皇后方氏合

塋 穆宗時以 孝潔皇后陳氏遷祔 永陵

穆宗莊皇帝陵曰 昭陵在天壽山 孝懿皇后李氏合

塋 諸陵各設神宮監并衛及祠祭署凡清明中元冬

至祭祀俱分遣附馬都尉行禮各衙門文武官陪祭忌

辰及正旦孟冬 萬壽聖節亦遣附馬都尉行禮 親

王之國詣 諸陵辭謝

按 九陵各置陵衛神宮監祠祭署如 孝陵正日酒

果清明中元冬至聖旦太牢分遣動戚大臣祀愍忌太
牢專遣動戚大臣祭

恭仁康定景皇帝陵在西山清明中元冬至及忌辰俱遣
儀實行禮

孝陵 長陵 獻陵 景陵 俗陵 茂陵 凡陪葬

諸妃歲時俱享於殿前有別塋諸妃俱遣內官行禮

恭讓胡皇后陵 景皇帝后二陵 世廟孝潔皇后繼

張后二陵 憲廟廢吳后 諸帝妃 懷獻世子 悼

恭太子 哀冲太子 莊敬太子 越靖王及貞惠妃

吳氏 秀懷王及妃黃氏 衛恭王及貞烈妃楊氏

新獻王 滕獻王 許悼王 忻穆王 申懿王 雍

靖王 岐惠王 湮簡王 蔚悼王 穎殤王 薊哀

王 咸懷王 均思王 景王 永清公主 長泰公

主 仙遊公主及諸阿保夫人墳 南京韓憲王張順

妃李麗妃墳 已上俱葬西山歲時遣內官行禮

壽春王同妃劉氏 霍丘王同妃翟氏 下蔡王 安

豐王同妃趙氏 蒙城王同妃趙氏 蒙城王同妃田

氏 寶應王 六安王 來安王 都梁王 英山王

已上俱國初追封墳在鳳陽府西北二十五里地名白

塔設時祭署陵戶

南昌王同妃王氏 盱眙王同妃唐氏 臨淮王同妃

劉氏 山陽王 招信王 已上俱國初追封祔葬鳳

陽 皇陵有司歲時祭祀皆與享其分封 諸王葬於
本封之國者其子孫自主祭祀此不具列

西內老佛 正統五年十二月廣西思恩州知州岑瑛
遇一老僧於道從者呵之不避詰其度牒乃楊應龍也
自言此非吾姓名自金川失守大內火起吾遂潛由地
道以出自湖湘入蜀至雲南復至閩最後入廣西至橫
州南門壽佛寺居居十五年僧徒歸者日衆吾復遁往
南寧陳步江一寺而歸者復如之乃又去南寧雲遊四
方以度歲月迤邐至此淪落江湖垂四十年老朽待盡
早晚入土無能爲矣願送骸骨歸瑛大駭聞于巡按御
史奏之驛送赴京號爲老佛途次賦詩云淪落江湖四

十秋歸來白髮已蒙頭乾坤有恨家何在江漢無情水
自流長樂宮中雲氣散朝元閣上雨聲愁新蒲細柳年
年紅野老吞聲哭未休及至京 朝廷未審何人以尚
膳太監吳亮建文時內使也使之審視老佛亮見卽曰
不是曰我昔御便殿時棄片肉於地汝伏地舐食之何
謂不是聞楊士奇尚在能出一證乎亮佯爲不知已而
復 命遂取老佛入西內壽終塋所出不封不樹

按弘治中禮部主事楊循吉嘗奏請追謚 建文君以

景皇帝及元順帝爲此謂順帝知天命歸我 太祖
遂避位而去其沒也得謚爲順况 建文君又非勝國
可擬者以親親言之固當視 景皇以避位言之尤當

視順帝追謚之典豈容已哉伏觀天順初英廟憫建庶人無辜釋其囚聽其婚娶出入萬曆改元詔復死事諸臣祀于其鄉則加建文謚號比諸景帝似于典禮爲當

睿宗獻皇帝陵曰顯陵在湖廣承天府之松林山

今號德

山獻皇后蔣氏合塋建享殿設神宮監顯陵衛

祠祭署置奉祀一員以戚屬爲之給署印設禮生二十四人供祭祀執事陵戶六十戶供灑掃校尉二十名供巡視十八年陞戚屬爲都督僉事給欽差純德山掌祀關防職專守護始於太常寺選補奉祀及增祀丞一員如七陵之制二十七年照長陵制設

左司樂一員右司樂三員俳長四名色長十四名教坊
師十六名供祀鑄給 顯陵供祀教坊司印信每歲清
明霜降 二聖忌辰遣鎮守湖廣勲臣行禮勲臣有故
以守護奉祀官代行奉祀官有故則分守官代 聖旦
正旦中元孟冬冬至遣守護奉祀官行禮

恭讓章皇后陵寢在金山祭遣內官行禮嘉靖二十五年
令於 未央宮莊田六百五頃九十七畝內量撥一半
供奉香火

景皇后陵寢與

景皇帝合葬祭遣儀賓行禮

今遣駙馬
及皇親

憲廟廢后吳氏塋金山祭以素羞遣內官行禮
世廟繼后張氏塋金山祭以牲醴遣內官行禮

孝陵四十妃嬪惟二妃葬陵之東西餘俱從葬

長陵十六妃俱從葬

獻陵七妃三葬金山餘俱從葬

景陵八妃一葬金山餘俱從葬

裕陵以後妃無從葬者以 憲宗遺 命罷殉葬也

裕陵十八妃一葬綿山餘俱金山

茂陵十四妃一葬陵之西南餘俱金山

康陵二妃葬金山

顯陵一妃葬金山

永陵三十妃二十六嬪惟五妃葬 天壽山之襖兒峪

餘俱金山

昭陵諸妃塋金山 先是妃皆自爲墳 憲廟十三妃
始同爲一墓嘉靖三十年以古世嬪御妻皆九宜九妃
爲一墓同一享殿內作七寶兩廂等各備於是金山預
造五墓墓各九數以次塋焉先是從塋諸妃歲時俱享
于 殿內其別塋者俱遣內官祭以牲醴嘉靖十七年
春二月戊辰 上如天壽山祀 陵始 命併入各
陵從祭 被恩殿之兩傍以紅紙牌書曰 大明某
宗皇帝第幾妃之位祭畢焚之至 隆慶六年改造木
位刻列名號置 各陵永遠從祀其 世廟諸妃並遷
祔 永陵各置木位配享

外戚王墳

揚王墳在鳳陽府盱眙津里鎮洪武初設盱眙祠祭署
置墳戶二百一十戶

徐王墳在鳳陽府宿州新豐里洪武初設宿州祠祭署
置墳戶九十三戶

滁陽王墳在直隸滁州洪武初立廟墳所置墳戶以奉
祭祀

昌平山陵事例

成祖永樂七年五月巳郊營山陵於昌平縣遂封其
山爲天壽山時成祖擇壽陵久不得吉壤而
仁孝皇后尚未塋禮部尚書趙珣以江西地理術人
廖均卿至昌平徧閱諸山得昌平東黃土山最吉成

祖卽日臨視定議 封爲天壽山 二十二年十一月

成祖塋 長陵 帝后下有十六妃附

仁宗洪熙元年九月 仁宗塋 獻陵 帝后下有七妃附

宣宗宣德五年二月乙未 上奉 皇太后率 皇后謁

長陵 獻陵 車駕發京師 三月壬寅駐蹕 陵

下開平守將陳邈務數事 上舉其屯田守備可行者

付所司施行 戊申 上奉 皇太后率 皇后還京

師 十年六月戊申塋 宣宗于景陵 帝后下有七妃附

按天壽山七陵惟 景陵規制獨小至嘉靖十五年稍

大之

英宗天順八年二月塋 英宗於 裕陵

憲宗成化四年九月庚申祔塋 孝莊睿皇后於 裕陵

后下有十八妃祔 二十三年十月壬午奉 憲宗

皇帝梓宮塋於 茂陵 帝后 紀皇后 邵皇后下

有十四妃祔

孝宗弘治元年夏四月 天壽山大風雹 上遣官祭告

戒諭羣臣修省 十八年六月奉安 孝宗于 奉

陵 惟 帝后二寶山無妃祔

武宗正德十三年夏四月朔 上以 大行太后梓宮將

祔塋親詣 天壽山祭告 六陵 十六年五月 武

宗塋 康陵 帝后下
一妃祔

世宗嘉靖十一年 皇陵祠祭署民田學士言臣等三千六

百家編視 皇陵供醴漿直澗補宣德中設守 陵太
監盜行簞歛 陵戶流移乞革太監以甦困憊 上特
命內臣勿預民事其勿革 十五年三月擇壽域奉
皇太后同謁 萬壽山陵 上躬行春祭禮 夏四月
作幽宮 上幸西山視工 命春以清明秋以霜降遣
官行禮各衙門官陪祭其中元冬至等節遣官行禮俱
不陪祭 九月 上躬行秋祭禮自 奉慈殿遷 孝
肅皇后神主于 裕陵 孝穆皇后 孝惠皇后神主
于 茂陵躬行奉慰禮 十七年二月 上躬行春祭
禮改 陵殿曰 祔恩殿門曰 祔恩門四月建 成
祖文皇帝 聖蹟亭於平臺山率從官行祭禮 四十

六年正月 世宗葬 永陵

穆宗隆慶元年正月丙寅禮部會議 陵葬之禮曰 宣
宗以前 陵寢合葬皆止一后至 裕陵則 二后同
祔葬 茂陵則 三后同祔葬今 孝潔皇后爲 皇
考元配禮應合葬 永陵 皇考發引宜先奉 孝潔
皇后梓宮于 永陵與 聖母 孝烈皇后梓宮同日
祔葬 二年二月丁未 上詣 天壽山展謁 諸陵
諭戶部曰朕躬奉春祀式弘 先德以惠民生所過
地方其量免本年田租尚書馬森等請覈昌平州宛平
大興二縣地凡建設 行宮及屯營軍爲開除馳道者
免十分之五所過者免十分之三 上允之仍命查所

毀民房亦量予價值以示軫卹 六年十二月穆宗塋

昭陵

遣祭山陵事例

太祖吳元年丁未夏四月 仁祖忌日 太祖詣 太廟
祭畢退 御便殿泣下不止顧謂起居注詹同日往者
吾父以是月六日亡兄以九日亡母以二十二日亡一
月之間三喪相繼人生值此其何以堪終天之痛念之
罔極愈嗚咽不勝左右皆感泣旣而 命 太子及
諸王往鳳陽展奠 皇陵臨遣惻然 命之曰吾 祖
宗去世已遠吾父母又相繼早亡每念劬勞鞠養之恩
惟有感泣而已今日雖尊爲天子富有四海致敬盡孝

爲一日之奉不可得矣哀慕之情昊天罔極今鳳陽

陵寢所在特命爾等躬詣致祭以代朕行孔子曰事

死如事生事亡如事存爾等識之洪武丙寅命皇

太子至盱眙縣修德祖玄皇帝玄皇后懿祖桓

皇帝桓皇后熙祖裕皇帝裕皇后諸陵寢遂塋

衣冠上親爲文祭告之時陵寢已備至乃是命

製袞冕服遣皇太子代禮祭祭文曰嗚呼昔者列

祖立命是方積德深長致天昭鑒福垂後嗣今也子孫

蕃衍宅於宇內以統黔黎深思皇考生前歲月之艱

思念列祖音容孫常切記已有年矣嗚呼以萬幾之

冗未獲躬詣拜掃今特遣玄孫皇太子以牲醴之奠

詣陵修繕敬塋衣冠以伸孝思 神其鑒之 乙卯

冬十月 詔定陵寢朔望節序祀禮時禮部學士樂韶

鳳等奏每歲元旦清明七月望冬夏二至日用太牢其

伏臘社每歲朔望日則用特羊祠祭署官行禮如節與

朔望伏臘社同日則用節禮從之 後清明中元冬至月祭 列聖陵寢分遣

勲戚大臣行禮翰林官二員陪祭 十五年夏遣使訪帝王陵寢先是

上閱宋史見宋太祖詔修歷代 帝王陵寢嘆曰此

美事也遣翰林編修蔡玄侍儀舍人李震等陳敏于謙

等四方求之仍 命各行省之臣同諸所在審視若有

廟祀并具圖以聞於是陳州有伏羲氏商高宗孟津漢

光武鄭州周世宗肇宋太祖太宗真宗仁宗鄧神農氏

卑遠舜帝延安軒轅氏西安周文王武王成王康王漢
高祖景帝咸寧漢文帝興平漢武帝長安漢宣帝富平
後魏文帝扶風隋高祖三原唐高祖醴泉唐太宗滿城
唐憲宗涇陽唐宣宗滑縣高陽氏高辛氏內黃商中宗
順天元世祖東平堯帝曲阜少昊氏趙城媧皇氏榮河
商湯王會稽夏禹王宋孝宗凡三十六陵 是年遣官
行視帝王陵寢遂禁樵牧設守陵戶陵二人三歲一傳
制遣道士奉香詣諸陵令有司致祭 皇帝卽位遣官
祭告嘉靖中又有武功姜源后稷之祠慶都堯母之祠
二十六年 令車馬過 陵者及守 陵官民入
陵者百步外下馬違者以大不敬論

成祖永樂元年 太祖高皇帝忌辰 上率諸王 奉先

殿祭畢仍率百官躬詣 孝陵致祭公侯駙馬伯文武

四品以上及近侍官於殿前行禮五品以下官於門外

行禮 二年五月己酉錦衣衛奏明日 上詣 孝陵

請具 法駕 上曰不用但以騎士數人前導已而顧

侍臣曰明日 皇考忌日正屬感慕之時何用 法駕

非爲辟除道路則前導騎士亦不可用 十七年十一

月丁巳甘露降 孝陵松栢三日

按 孝陵四十妃嬪祔葬 陵設神宮監 孝陵祠祭

署冬至太牢正旦清明中元 帝后愍忌 聖旦酒果

勲戚大臣一人奉祀事 國有大事遣大臣祭告 孝

陵東有 懿文太子陵祀禮視 孝陵四孟歲暮忌辰
加牲署官行事

英宗正統元年 諭禮部每遇山 陵祭祀之日與百官
俱具淺色衣服 二年 諭都察院天壽山 祖宗陵
寢所在敢有剪伐樹木者治以重罪家屬發邊遠充軍
卽出榜禁約仍令錦衣衛官校巡視工部同欽天監官
環山立界外聽民樵采

憲宗成化九年奏准南京 孝陵祭祀凡文武大小官員
有不赴者令御史糾察 十五年 令鳳陽 皇陵皇
城并泗州 祖陵所在應禁山場地土巡山官軍務要
用心巡視不許伐樹取土石開窑燒造燒山及於 皇

城內外耕種牧放作踐有犯者正犯處死家口俱發邊
遠克軍有料歛銀兩饋送不用心巡視及守備留守等
官貪圖賄賂不嚴加約束以致下人恣肆作弊不能禁
治者一體重罪 昇年尊上 仁祖陵曰 英陵時禮
部尚書崔亮以既 上尊號請行祭告禮太常博士孫
吾與奏云漢唐故事其於祭告之禮并無且 廟號與
陵不同 廟號是易大行之號不祭告不可故必上
冊謚以告之神明若 陵之有號則從之嗣王所以
識別先陵而已故歷代皆不以告今 英陵加號亮欲
行祭告臣竊以爲非宜亮駁之曰加上陵號尊歸先世
考之典禮如漢光武加上先陵曰昌宋太宗加上高祖

陵曰欽曾祖陵曰康祖陵曰定考陵曰安蓋創業之君
尊其祖考則亦尊崇其陵既尊其陵亦必以告禮緣人
情加 先帝陵號而不以告 先帝者非人情也臣以
爲告之是 上勅廷議僉曰亮議是遂遣太常行告祭
禮

山陵躬祭儀 一先期太常寺備吉 廟及祀 陵祭
品如常儀翰林院撰祭告文錦衣衛設 丹陛儀衛扈
行兵部奏請 簡命文武大臣居守京師請 勅行事
及奏請直守 皇城四門京城九門分調提督武臣守
各山門關隘選點扈 駕軍馬奏差科道官點闡戶部
開給扈從官軍行糧工部差官修理橋梁道路光祿寺

預備 御膳酒飯供具教坊司備大樂五府及九卿衙
門正官司屬官各一員太常寺鴻臚寺堂屬官光祿寺
太僕寺卿翰林院學士并日講官國子監祭酒順天府
府尹六科官六員十三道官十三員俱從凡在途供事
以便衣朝叅以吉服前期一日 上率 后妃告于
廟至早免朝 駕發由 長安左門 后妃輦轎由
東安門出扈從官前行居守官同文武百官俱吉服趨
德勝門外候送 駕過退 駕至 行官在个畢進膳
畢 陞座從官朝見行叩頭禮如常儀次日早從官朝
叅奏事畢鴻臚寺官引昌平州官吏師生及公差有事
官員見行五拜三叩頭禮朝罷從官先行至 天壽山

行宮候 駕 駕發 后妃後從至 天壽山紅門

上降輦由左門入 駕至行宮今名感思殿進膳畢 上出

陞座從官行叩頭禮畢 場次日早從官朝參奏事如

常儀一致祭是日免朝質明 上具青袍恭詣 長陵

致祭如常儀隆慶二年仍詣 永陵 昭陵各行禮遣官

六員青服各詣 陵行禮從官俱青布服恭詣 長陵

陪祀祭畢先趨赴行宮候 駕每日早朝參奏事如常

儀 一回 是日早免朝從官先行至沙河 行宮

候 駕 駕至從官行叩頭禮如常儀次日早從官朝

參奏事畢鴻臚寺官引昌平州官吏師生辭行禮如常

儀朝罷從官先還 駕由德勝門入文武百官及軍民

耆老人等俱於門外候迎居守文武大臣伏謁 駕前

致詞行叩頭禮教坊司大樂鼓吹振作 駕入告 廟

謁 皇太后禮畢隆慶二年發京前一日及還京日並謁告 奉先殿 世宗几筵 弘孝

神霄殿 還 官越二日 上御奉天門文武官各具

吉服致詞行禮 山陵遣祭儀 陳設用牲醴贊引引

遣官由 殿右門入典儀唱執事官各司其事贊引引

遣官就拜位執事捧香合至香案贊引贊詣前導遣官

至香案前贊跪贊上香遣官三上香訖贊復位贊四拜

通贊衆 典儀唱奠帛行初獻禮執事捧帛爵各跪獻于

御案前訖贊跪通贊衆 贊讀祝讀訖贊俯伏興平身

通贊衆 典儀唱行亞獻禮儀同初獻進 唱行終獻禮儀同

亞贊四拜送贊象官同

典儀唱讀祝官捧祝進帛官捧帛詣

瘞位贊禮畢

各陵祝文

清明霜降日時維

仲春雨霽既濡季秋霜露既降

追念

深恩不勝楊

恤謹用祭告伏惟尚享

中元冬至日氣序流邁時維

中元冬至

追念

深恩伏增哀

感謹用祭告伏惟尚享

凡祝文皆備書

謚號其文皆同但隨

陵異稱

顯陵祝文

清明霜降日維某年某月某日

孝子皇帝

御名

謹遣

某官敢昭告于

皇考睿宗知天守道洪德淵仁寬穆

純聖恭儉敬文獻皇帝 皇妣慈孝貞順仁敬誠一安

天誕聖獻皇后尊靈曰時維仲春雨雨露既濡瞻望園

陵不勝休惕謹用祭告伏惟尚享

中元冬至曰氣序流邁時維中元冬至追念 深恩益增哀

感謹以牲醴庶品用申祭告尚享

忌辰祝文曰惟我 皇考 皇妣諱日之辰瞻望 德

恩不勝伏增哀感謹用祭奠伏惟尚 享今稱孝曾孫皇曾祖考妣

恭讓章皇后祝文 孝玄孫嗣皇帝御名謹遣某昭告

于 恭讓誠順康穆靜慈章皇后尊靈曰日月不居仙

遊益遠茲遇某節不勝追慕謹用祭告伏惟尚 享

景皇帝后祝文 姪玄孫嗣皇帝御名謹遣某官某昭

告于 恭仁康定景皇帝 貞惠安和景皇后曰節序
流邁時維某節追念親親良增傷感茲以牲醴用修時
祭伏惟尚 享

世宗奉 皇太后謁 陵儀 先期太常寺具酒果脯
醢翰林院撰告辭 上至 長陵行謁告禮 皇太后
率 皇妃入女官奏就位行四拜禮奏上香女官捧香
皇太后三上香訖奏復位跪 皇太后跪 皇妃皆
跪 皇太后之左讀辭官跪于 上後讀訖奏興四拜
禮畢次詣 獻陵 上先謁告仍奉 皇太后謁如前
儀次謁 景陵同明日徧謁 裕陵等四陵亦如之
上還往西山拜 恭讓章皇后及 景皇帝后各 陵

寢行三獻禮又遣官前詣孝陵 顯陵行祭告禮

世宗 駕幸承天府謁 陵儀 前期太常寺陳設牲

犢酒醴香燭制帛 上具常服詣 陵由 陵左門入

殿左門內贊奏就位奏上香奏四拜奏奠帛行初獻禮

贊讀祝奏跪讀祝官讀畢奏俯伏興平身奏行亞獻禮

終獻禮如儀奏四拜焚祝帛禮畢從 駕官及撫按等

官俱吉服陪拜 祝文 維某年 某月 某日 孝子皇

帝 御名 敢昭告于 皇考睿宗知天守道洪德淵仁寬

穆純聖恭儉敬文獻皇帝尊靈曰仰惟 皇考玄德

帝忻流慶小子丕緒天位十有八年南瞻 殿寢罔盡

展祀之孝適以 陵園事重 躬事來此敬申祭告伏

惟 聖靈歆鑒俯納孝思謹告

續文獻通考卷之一百三十四

皇明進士雲間王圻纂輯

謚法考 總記

儀禮士冠禮生無爵死無謚卿大夫有爵故有謚

周禮春官太師掌大喪帥瞽而厥作柩謚

廢興也興言王之行謂瞽諷誦

其治功之詩也

諸侯薨臣子跡累其行以赴告王王遣大臣

會其葬曰謚之又太史掌小喪賜謚小史掌卿大夫

之喪賜謚讀誄

小喪卿大夫喪

大戴禮曰謚者行之跡也號者功之表也

曲禮曰惟天子稱天以誄之

魯子問曰賤不誄貴幼不誄長天子至尊故稱天以誄之

又曰已孤暴貴不爲父作謚

杜佑通典云趙商問鄭志曰已孤暴貴不爲父作謚而武王卽位追王太王王季文王改謚爵何也答曰周道之業興於三王之功德由之王迹初焉凡爲人父豈能盡賢乎若湯禹殷涉則不追謚矣

又曰既葬言謚曰類

王通曰謂類象其行言於天子以求謚也

樂記曰闢其謚知其行

郊特牲曰死而謚之禮也古者生無爵死無謚

表記曰先王謚以尊名節以壹惠耻名之浮於行也

白虎通曰號法天也法日也日未出而明謚法地也法月也月已入有餘光是以大行受大名細行受小名行生於已名成於人

又曰天子崩諸侯至南郊謚之以爲臣子莫不欲褒稱

其君掩惡揚善故於郊明不得欺天也后夫人謚臣子

共於廟議之

婦人本無外事故不於郊

又曰卿大夫老歸死有謚者別尊卑彰有德也

卿大夫歸無過

猶有祿位故有謚也

五經通義曰桓王時蔡侯卒謚桓有德則善謚無德則惡

謚故同也

又曰號者所以表功德號令天下也謚之言列也陳列

所行善有善謚惡有惡謚也

又曰婦人以隨從爲義夫貴於朝婦貴於室故得蒙夫

之謚

又曰夫人無爵故無謚

或曰夫人有謚夫人

一國之母修閨門之內群下亦化之故設謚章其美惡
公羊傳曰堊宋共姬稱其謚賢之也卿大夫妻命婦也
無謚者以賤也妾無謚亦以卑賤無所能與猶士卑小
不得謚也

秦始皇既併天下追尊莊襄王爲太上皇制曰朕聞上古
有號無謚中古有號死而以行爲謚如此則子議父臣
議君也甚無謂朕弗取焉自今以來除謚法朕爲始皇
帝後世以數計二世三世至于萬世傳之無窮

致堂胡氏曰子議父臣議君而非其禮罪不容誅矣考
德行之實而稱天以誅之臣子亦安得而私之哉然後
世謚法雖存而公道不暢爲臣子者徃徃加美謚於君

親便受所不當得者取世訕笑則又不若不謚之爲愈矣

五峯胡氏曰昔周公作謚法豈使子議父臣議君哉合天下之公奉君父以天道耳孝愛不亦深乎所以訓後世爲君父者以立身之本也知本則身立家齊國治天下平不知本則縱慾恣暴惡聞其過入於滅亡天下知之而不自知也不合天下之公則爲子議父臣議君矣臣子於君父有不善所當陳善閉邪引之當道若生不能正既亡而又黨之是不以天道奉君父而以人道事君父也謂之忠孝可乎今夫以筆寫神者必欲其肖不肖吾父則非吾父不肖吾君則非吾君柰何以謚而不

肖之乎是故不正之謚忠臣孝子所不忍爲也

漢獻帝初平元年省孝和以下廟號初孝和廟號穆宗孝安號高宗孝順號敬宗孝桓號威宗至是蔡邕以爲宜省去從之

魏劉輔等論古者存有號則沒有謚必考行迹論功業而爲之制漢不修古制大臣有寵乃賜之謚今國家因用未革臣以爲今諸侯薨于位者可有謚宜定品秩之限尚書衛覬奏舊制諸王及列侯薨無少長皆賜謚古之有謚隨行美惡非以優之又以明識昭穆使不亂也臣以爲諸侯王及王子諸公侯薨可就行跡賜謚其列侯如有功勞可一切賜謚至于襲封者則不賜謚尚書趙

咨奏諸襲爵無殊才異勲于國及未冠成人皆不宜賜
謚黃門侍郎荀攸議以爲古之謚記功懲惡也故有桓
文靈厲之謚今侯始封其以功美受爵士者雖無官位
宜皆賜謚以記其功其以功受爵而身在本位類皆比
列侯自關內侯以下及名號賜爵附庸皆非謚所及若
列侯襲有官位比大夫以上其不蒞守理事則當宿衛
中勤或身死王事皆宜加謚其餘襲爵既無功勞官小
者彼皆不足錄入座議以爲太尉荀勗所定五等列侯
以上嘗爲郡國太守內史郡尉衙門將騎督以上薨者
皆宜賜謚從之

晉武帝太康六年劉毅卒時承漢魏舊制爵非列侯雖有

高行而不加謚羽林左監北海王宮上疏言殺忠允匪躬宜蒙謚號帝出其表使八座議之多同官議奏寢不報

東晉元帝大興三年詔古者皆謚名實相稱頃來有爵乃謚非聖賢本意通議之

彭城國爲李太妃求謚太常王彪之議曰服虔註聲子之謚非禮也婦人無謚太始以來藩國王妃無有謚者甲興敬后登祚乃追謚牙瑯琊武王諸葛妃恭王夏侯妃元帝猶抑蒸蒸之至情不追謚彭城太妃豈宜追謚哉

唐制太常博士掌凡王公以下擬謚皆跡其功德而爲之

褒貶無爵稱子養德丘因聲實名著則謚曰先生大行
則大名小行則小名告贈謚於柩 註云諸謚職事官
三品以上散官佐吏錄行狀申考功勘校下太常擬謚
號申省議定奏聞

玄宗天寶八載加聖祖及諸帝后號謚十三載復加

吏部尚書顏真卿上言上元中政在宮壺始增祖宗之
謚玄宗末姦臣竊命有加至十一字者按周之文武言
文不稱武言武不稱文豈聖德所不優乎蓋稱其至者
也請自中宗以上皆從初謚睿宗曰聖貞皇帝玄宗曰
孝明皇帝肅宗曰宣皇帝以省文尚質正名敦本上命
百官集議儒學之士皆從真卿議獨兵部侍郎袁傖官

以兵進奏言陵廟玉冊人主皆已刊勒不可輕改事遂寢

尹起莘曰增謚之事前古無有也而始於唐人其溢美無實不經之甚然當時臣子莫敢言之獨一顏真卿抗論其失而亦不能改故書詔議省祖宗謚以幸其有是議而惜其卒莫之省以譏之

范氏曰堯舜禹湯文武之君謚號惟一而已既稱天以誅之則子孫不可得而改也高宗不師古昔始改祖宗舊謚天寶以後增加複重至繁而不可紀夫祖宗苟有高世之功德則曰文曰武足矣若其無功德而子孫妄加之則是誣之而使天下後世以爲譏玩也故孝子慈

孫之欲顯其親莫若使名副其實而不浮則天下心服之矣未聞以謚號繁多爲貴也唐之典禮不經甚矣

杜佑曰周制士冠禮云天子之元子士也士無謚是知

太子無謚

以未得有所施行故不得設謚

宋武夷胡氏曰古者死而不謚不以名爲諱周人以謚易名於是乎有諱禮故諸侯薨訃不以名

程子曰古之君子相其君而能致天下於大治者無他術善惡明而勸懲之道至馬耳勸得其道而天下樂爲善懲得其道而天下懼爲惡二者爲政之大權也然行之必始于朝廷而至要莫先于謚法何則刑罰雖嚴可警于一時爵賞雖重不及于後世惟美惡之謚一定則

榮辱之名不朽矣故歷代聖君賢相莫不持此以勵世風也

羅泌路史曰古之法行于今者惟謚然二千餘年而靡有定法大戴氏曰昔周公旦太公望相嗣王以制謚法周書之說亦然故今周書有謚法一篇頗爲簡要至杜預取而納之釋例而世遂重出之謂春秋謚法蓋不知也異時有廣謚者沈約賀琛皆嘗本之約又撰著謚例事頗詳備而琛之書特少去取且復強爲君臣婦女之別亦無取焉太宗皇帝爰命庖家裁著新書然而亦莫究明蘇洵于是究定古今斷以書傳刊其重復以爲法雖其或從或違時亦有合聖人之意然其必欲合以堯

舜三王五帝之時則大謬矣夫謚者原其號者也其不出于周公之前予嘗論之彼號近古而好牽合者無過漢儒而漢儒亦謂堯舜禹湯不入謚法則其說可槩見矣且在周書初無堯舜禹湯桀紂之文至預而後增之以湯益無所據商之太宗中宗高宗本非謚法特以其一時功烈推而崇之耳乃若甲丙庚壬乙丑丁癸何由而爲謚哉若古論謚爲法最簡故賈山曰古聖作謚不過三四十言而蔡邕之書纔四十六然猶不及世本大戴之所載者洵乃以二書邕不之見見則無不載矣周書之篇乃周公之法而春秋之謚出于此今洵反謂周公者爲最繁襍而春秋者爲簡而不亂又謂周書謚法

以鄙野不傳則知二書洵亦未嘗見也按洵書曰匹夫
之有謚始東漢之隱者婦人之有謚始景王之穆后夫
婦人之與周三后其著者也而穆王之庶姬亦有哀淑
人之謚見于穆天子之傳匹夫之典夷齊其著者也而
齊之黔婁已謚曰康見于高士傳二者其來久矣此楊
侃爲職林書謂公主之有謚自唐之唐安始乃不知世
祖之平陽昭文公主與齊高帝之女義興憲公主始也
邕之言漢毋無謚至明帝始建光烈之稱于是請正和
熹之號而不知元帝之母許恭忠高帝之母媼已有昭
靈之號又何耶婦人無外行者也生也姓配其國沒也
謚從其夫明有屬也秦竇鄒曼陳媽韓姑以姓配國者

也。秦穆姬宋共姬魯文嬴與夫共莊宣之三姜以謚從夫者也。惟死先夫則異其謚。景之穆后桓之文姜莊之哀姜之類是也。後死而殊謚抑何典耶。今不知攷而更請正和熹光烈之稱。豈先王之典哉。嗟夫。顏閔至德不聞有謚而朱暉于穆輒加父以貞宣及穆之死。邕復以文忠被之。穆則廢典。邕亦不知禮耶。其貽譏于荀爽而見詰于張瑨也。豈矣。抑嘗言之。謚者正先王之所謂名教也。然古之謚爲名教而後世之謚爲廢典。東漢莎車以蠻夷而膺茂典。此何爲耶。然則邕之違禮豈惟邕之罪哉。德又下衰其流及于藝術與緇黃矣。名教之失孰甚于是。顧不謂辱典耶。

元世祖至元二十二年制謚法

武宗至大二年詔內外百官三品以上者許請謚凡請謚者許其家具本官平日勲勞政績德業藝能經由所在官司保勘與本家所供相同轉申吏部考覆呈都省都省擬準令太常禮儀院驗事蹟定謚若勲戚大臣奉旨賜謚者不在此例

順帝至元元年命嚴謚法以絕冒濫

皇明

國朝謚法凡 皇帝十七字 皇后十三字 皇妃 東宮東宮妃二字 親王用一字郡王用二字其文武大臣亦用二字與否取自 上裁若官品未高而侍從有

勞或死勤事 特恩賜謚者不拘常例夷王得特 賜

謚洪武初議謚俱禮部奉 旨施行

憲宗成化中駙馬都尉周景爲其父鴻臚卿顯乞贈謚并
乞母祭 憲宗不允遣官 諭祭其母

孝宗弘治四年戶部尚書劉昭子綺奏乞贈謚禮部覆奏
劉昭前被劾削太子少保致仕何可復與贈謚此後有
乞恩贈謚者禮部斟酌可否務合公論不許一槩比例
濫請仍令禮科記之 十五年唐王彌_帝奏 朝廷於

親王生封以爵歿加以謚親親之意既深且厚但其
爲惡未敗者擬例上請多獲美謚是使善者怠惡者肆
也今後 王府請謚宜勘覆實跡庶彰旌善殫惡之公

禮部覆奏今後親王薨逝請行撫按覆勘郡王病故則行本府親王及承奉長史等官覆實善惡賢否據實具陳奏然後賜謚使名與實副從之時吏部尚書馬文升奏二品以上大臣卒其子孫乞謚有賜有不賜者有謚及三品者美者多惡者少與者少不與者多乞斷自今凡二品以上大臣及始立功所封公侯伯卒無間見任致仕應與謚者或三品有特賜者宜令吏兵二部備查勲業行實仍下禮科給事中詳議等第上請賜謚若所議未公許言官舉劾禮部覆議乞仍遵舊例凡文武大臣謚俱本部具奏既得旨移文吏兵二部詳述勲業行實等第送翰林院定擬上請得

旨行吏兵二部備查實跡本部定爲上中下三等以
行業俱優者爲上行實頗可者爲中行實無取者爲下
聞送翰林院擬謚請 旨

武宗正德七年吏部尚書楊一清等議覆給事中楊禔本
自今在京三品以上官考滿復職已給 詔命者本部
咨事歷歷詢其行實果堪磨錄移咨禮部奏請其曾被
劾或雖未被劾而素譽有虧及雜流出身者俱不聽與
年終身後卹恩子孫陳乞者贈官由本部查議而其謚
號葬祭禮部亦須先會本部議其人品資望方與具奏
若庸碌無補及屢被論劾者俱已之間有人品才望素
著雖嘗被劾或因一事之失或出一人之尤不致虧損

名節者該部各具實奏請定奪見任官不許輒自陳乞
其被劾實去職及故久大臣子孫違例妄奏者罪之議
上既得 俞旨禮部尚書傅珪等奏駁之曰廢子入監
葬祭謚號乃本部職掌今欲預定恩廢於考滿到部之
時先議謚號葬祭於禮部具奏之始與職掌會典并見
行事例不合又廢子不許自陳乞與例亦不相同即如
其說既經考滿復職又已請給 誥命則其人之賢可
知矣旋又察其歷履詢其行實不免有高下其手之嫌
葬祭謚俱有定法行之已久今必先行吏部會議方與
查例不免有往來移文之擾況每遇前項事務必待該
司查報至日然後具奏吏部又未嘗不與知也其陳乞

之舉固爲可厭必欲一槩禁之似又難行蓋春官侍從者多論功於既沒之後不得不陳奉使海外者多非三品之官不得不陳至於補廕之子繼嗣之子及三品以上應得恩典而沒未久者不得不陳但當罪其違例陳乞者其餘事宜仍舊歸之禮部其稱間有才望人品素著或因一事之失或出一人之見而被劾者該部各其實未請此雖舊制所無而處置得宜則其可行也乃從珪所議既而一清又以諸司職掌廕叙列司封部下爲言得仍前 旨適侍郎王瓊乞子入監吏部爲覆請珪復爭曰言官建白吏部覆議皆謂大臣不得自陳乞瓊乃大臣自乞者而吏部又爲之請殊戾前奏且禮部

掌行廢叙已數十餘年莫有非之者何至今日改之且職掌此條特言廢官非爲廢子入監言也豈有國子監既屬禮部而其事有不屬者乎時竟令吏部掌行之蓋一清方秉用珪卒爲所軋然其是非固自有在也

王世貞弇山別集序曰余嘗有謚法通紀三十卷列其凡而序之所以標先王制謚之本旨與歷代沿革輕重之變畧備矣至明亦有紀而未甚詳于是徧考金匱國史之藏秘閣之籍叅以家乘而後靡所不備凡有釋義者皆閣籍也每故事大臣卒禮部以謚請報俞矣則內閣以兩字者三請于上而自擇之是以具釋義也洪武之尚爲吳也諸功臣死事及有勞而天者皆榮

公侯之爵而傳之謚終 高帝世文臣弗得也武臣即
都督弗贈侯伯弗得也至建文而待制王禕得謚文節
矣文臣之有謚自禕始也其謚小臣者亦自禕始永樂
制嚴矣終 太宗世文臣之得者僅姚恭靖廣孝胡文
穆廣而恭靖之爵則公也文臣之有謚僅文穆一也洪
熙初始大合故臣凡勞于國諡于 青宮三品而上易
名者十餘人而後文臣之謚廣然 宣英之代猶斤斤
焉持其柄而弗輕予且夫 魯王愛子也秦王次嫡子
也 高帝命之曰荒曰愍而登之冊曰不敢以子故而
廢天下公其于 宗室諸王子尚有靳也文臣之有榮
愍也則瑕弗掩也文榮之以爵也文愍之以事也庶幾

寓貶矣婦人之有謚也自 后妃而外則死節也 公主之有謚也自 仁宗之悼愛女始也乳媪之有謚也自 宣宗始也乳媪之夫之有謚也亦自 宣宗始也方士之有謚也自 世宗始謚而四字甚矣而使方士得之則益甚也 世宗之季吾又得二事焉夏文愍之持秉則同列皆中謚及身以罪死易世而後牽復所得者中下謚也繼而嚴氏之持秉則其子爲市焉非 上所甚注懷者必賄而後得不賄不得也即得之不腆不上謚之也及身以罪竄削弗謚也夫謚者 人主之春秋也尊則稱天以命之不尊則與天下共隲之而柰何爲大臣修怨賈利地也然則如之何其必畧採唐宋故

事遇大臣以謚請有 俞旨則翰林之司篆者爲議而定二謚焉以授禮科科詳之復議而上之閣臣復奏而取 上裁凡文臣二品而上及勲親王公必謚侯伯之蒞軍府加保傳必謚謚兼美惡二品以下自卿佐以迨庶僚有德行政術亦謚謚則言官請之禮部裁之有美無惡可也自 國初以至先臣勲臣若傅友德若徐輝祖之類文臣若章溢若唐鐸若胡儼若魏源之類武臣若劉王馬永王効之類諫臣若楊瑄黃鞏王恩楊爵之類儒林若吳與弼陳獻章胡居仁之類文苑若李夢陽何景明楊慎李攀龍之類追之以謚可也勲臣若李善長馬勝廖永忠耿炳文丘福之類文臣若陳循若徐有

貞之類追之以謚謚而不盡蔽瑕可也又若干譙者易之以上謚可也萬安劉吉汪鉉張瓚者易之以下謚可也凡此數者皆所謂與天下共隲之操法于賞罰之外而毋使人得而議其後者也

按古謚法文之釋義蓋不徒以詞章述作稱故國初恩典有非翰林而謚文者若劉文成基馬文簡京姚文敏夔唐文襄龍葉文莊盛魏文靖驥儲文懿瓘鄭文安賜儀文簡智楊文恪蕪邵文莊寶李文通奎何文肅喬新何文簡孟春黃文毅孔昭蕭文昭維楨吳文恪訥王文成守仁是也有官翰林而謚不以文者如王毅愍文陳莊靖文表榮襄宗臯劉忠愍球楊莊敏鼎盛榮簡端

明朱恭靖希周是也成弘以後則翰林專謚文而他曹不與矣

弇山集又曰國家謚法非三品以上兩京大臣不得與然而亦有得之者如楊恭惠信民以僉都御史劉文恭鉉以少詹事宋文恪訥李文忠時勉陳文定敬宗鄒文莊守益以祭酒李文通奎劉文介儼以太常少卿俱四品朱文肅善胡文穆廣呂文懿原以翰林學士張文僖益以侍讀學士楊忠愍繼盛以兵部員外郎朱忠定復張恭僖景明以長史俱五品徐文肅善述以春坊中允王文靖汝玉以贊善王文忠禕以翰林侍制劉忠愍球以侍講羅文毅倫舒文節芬俱以修撰羅文恭洪先以

贊善蔣恭靖用文以院判俱六品鍾恭愍同以御史七品陳恭愍選以布政毛忠襄吉周節愍憲馮恪愍傑許忠節達以憲副岳文肅正以知府鄧恭毅顯以知縣雖品秩不同要皆無愧大典者獨蔣以小伎獲之殊爲幸耳

按楊豫孫所著謚纂有日南知州何忠節忠上蔡知縣霍愍節恩弇州集以爲非謚似亦無據又謂院使袁宏謚襄敏考之正史有祭葬而無謚鄭汝璧所編袁襄敏寶亦由院使得謚恐名字之誤耳

張志淳論謚法曰 高皇帝跡行定謚至謂不容私諸子而謚以荒 文皇帝表章性理以謚法係諸治道且

歷載宋儒之論以今考之古之用謚美惡並也近專美而無惡豈人皆善而惡謚無所于加抑亦惡不復謚而謚者得以掠美也

丘文莊公謚議曰臣謹按先正有言國家所以馭臣下者不過禍福榮辱而已爲善者生享其福死受其榮不善者生遇其禍死蒙其辱天下雖欲不治安不可得也如有不令之臣生則盜其祿位死則盜其榮名善者不知所勸惡者不知所懼臧否顛倒不可復振其爲害可勝道哉臣惟生者之禍福出於一時之蒙蔽衆論之不公人衆者勝天固可僥倖而苟免然而事久則論定天定則勝人至於蓋棺事則定矣然猶以偏愛之心持不

公之論以愚而爲賢當辱而反榮是終無天道矣是以
三代明王立爲謚法以爲死後榮辱之典善者予之以
美謚惡者予之以惡謚孟子所謂孝子慈孫百世不改
而世之昏君僻臣乃以一己之私而掩天下之公非惟
得罪於世教而實得罪於天帝也三代以前君之謚則
請命乎大臣之謚則請命於君天不言而人代之言人
代天言而反天之道天必殛之君不自任而俾臣代之
臣承君命而負君之托逆天之理違國之法雖一時追
於人刑其如天道何唐宋議謚掌于太常博士凡於法
應得謚者考其行狀撰定謚文移文吏部考功郎中覆
定之 本朝雖設太常博士而不掌謚議洪武初惟武

臣有謚至永樂中文臣始有謚蓋自姚廣孝胡廣始也
自後文臣亦多有之然我朝之謚皆出恩賜臣竊
謂九重之上於臣下之賢否未易盡知請自今以後
有應得謚者未賜之先先下有司考訂以聞然後從
中賜下如此則得之者以爲榮不當得者不因其親
故之囑託其當得者不爲朋黨之掩蔽國家激勸臣
子之大端有在於是其爲世教之助夫豈細哉

今上萬曆元年題准大臣應得謚者禮部仍廣加咨詢稽
覈名實間有應謚而未經題請及會題請而未蒙賜
謚者不論遠近許各該撫按及科道官從公舉奏禮部
酌議題覆補給若不係公舉子孫自陳乞補謚者不行

十二年題准凡遇文武大臣應得謚號者備查本官生平履歷必其節槩爲朝野具瞻動猷係國家休戚公論允服毫無瑕疵者具請上裁如行業平常即官品雖崇不得槩與二十六年九月禮科羅棟奏爲循職掌採公平摘舉缺謚名臣原任兵部尚書伍文定值宸濠發難倡義先登戰不逾時而擒元惡兵部尚書毛伯溫當交趾作孽深入險阻兵不血刃而降酋長吏部左侍郎張元楨受知孝廟不合宰臣想其丰采比之祥麟瑞鳳刑部侍郎吳悌抗節西臺屏居二紀評其氣象擬於嶽峙淵澄都御史魯穆希心玄曠羔羊之節久而不渝兵部尚書郭宗輦敦尚風節蓋桂之性老而愈

烈僉都御史宗天植忠孝尤確守四知之家法大理寺卿夏時正學成恬澹乃超慕孤山之高踪刑部尚書李廷歷官途四十年而家無長物禮部侍郎田一儁在詞林二十載而人無間言大理寺卿陳恪之清修絕俗尚寶司卿孟秋之高潔邁群中允郭希賢以忠諫殺身庶吉士鄒智以直言貶職御史劉台之執持風紀中允張元忭之不愧科名以上諸臣合于例而應得謚者或循例議補格于例而不得謚者或破格議與可也 上曰謚法乃國家激勸大典以彰前賢以勵後進以定萬世之公論這所奏着禮部從公看實議謚具奏以憑裁奪亦有謚之美惡未當其人查來俱改正行 十月禮部

覆按臣喬璧星本議謚 上曰卿等虛心詳議應謚的
准與補謚若已謚的果與衆議不協方許改正追奪毋
得苛求以傷 朝廷錫予之典其議謚類奏係你部裡
職掌以後還照舊行 二十八年七月山西道御史李
時華奏原任禮部右侍郎陞南京工部尚書孫應鰲掘
起黔南爲時山斗究學術則講明于關中發揮于大學
論事功則戡亂于西蜀詰戎于鄖陽誠王守仁趙貞吉
之流亞也應備會議以錫謚典 八月大學士沈一貫
揭奏 佑聖夫人徐氏謚號勤敬榮安四字乞 欽定
上曰朕恤佑聖夫人奉侍三朝恭勤茂著着照謚號
四字俱賜與他以示眷酬此係 特恩後不爲例 諭

州等知

歷代謚法釋義

周公謚法 周公旦太公望開嗣王業建功于牧野

終將葬乃制謚遂叙謚法

民無能名曰神 善不可名

靖民則法曰皇 靖安也

德象天地曰帝 同于天地

仁義所往曰王 民所歸往

立志及眾曰公 志無私也

執應八方曰侯 所執行八方應之

慶賞刑威曰君 能行四者

從之成群曰君 民皆從之

教誨不倦曰長

揚善賦簡曰聖 衆善播揚所賦得簡

敬實厚禮曰聖 聖于禮也

一德不懈曰簡

平易不訾曰簡 不信訾毀一云不疵

尊賢貴義曰恭 會編有淵源通流曰恭

敬事供上曰恭 供奉也

尊賢敬上曰恭 敬有德讓有功

愛民長弟曰恭 恤民字幼

執禮御賓曰恭 御迎也

既過能改曰恭

執事堅固曰恭 守正不移

庇親之闕曰恭 修德以益之

尊賢讓善曰恭 不專己善推于人

臨照四方曰明 以明照之

諧怨不行曰明 逆知之故不行

經緯天地曰文 裁成其道

道德博聞曰文 無所不知

勤學好問曰文 敏而好學不耻下問

慈惠愛民曰文 惠以成政

愍民惠禮曰文 惠而有禮

錫民爵位曰文 與賢同升

威儀悉備曰欽

安民大慮曰定 以慮安民

大慮靜民曰定 會編無此條

純行不爽曰定 行不一傷

安民法古曰定 不失舊憲

辟地有德曰襄 取之以義

甲冑有勞曰襄 有功征代

綏柔士民曰德 士民皆安德及天下

執義揚善曰德 守已義揚善人

諫諍不威曰德 不以威拒諫

剛彊直理曰武 剛彊不屈直人以理

威強敵德曰武 威強能勝以德

克定禍亂曰武 以勇往故能定

刑民克服曰武 法以正民使服

孝志多窮曰武 大志行兵多所窮極

小心畏忌曰僖 思所當忌按會編有慈惠愛親曰僖

質淵受諫曰釐 深故能受

有伐而還曰釐 知難故退按會編有慈惠愛親曰釐

溫柔賢善曰懿 德性純淑

心能制義曰度 制事得宜

聰明睿哲曰獻 事理皆通

知質有聖曰獻 有通無蔽按會編有博聞多能曰獻
安民立政曰成 安靖其民政可垂後

淵源流通曰康 往無所忌

溫良好樂曰康 性稟謙和

安樂撫民曰康 四方無虞

令民安樂曰康 富而教之

五宗安之曰孝 體親睦宗

秉德不回曰孝 守德無邪

慈惠愛親曰孝

協時肇享曰孝 因時肇享

大慮行節曰孝

執心克莊曰齊 敬存于心

資輔就共曰齊 資輔相共成功

布德執義曰穆

中情見貌曰穆 公而顯明

甄心勤懼曰頃 甄精也

敏以敬慎曰頃 敏疾不縱會編無 又曰甄心勤懼

容儀恭美曰昭 淑儀不愆

明德有勞曰昭 布明其德而有功勞

聖問周達曰昭 令名洋溢

柔德安衆曰靖 和以安民

恭已鮮言曰靖 正容寡言

寬樂令終曰靖

寬廣和樂以善自終

威德剛武曰圉

能禦禍亂

治而無青曰平

無災患

執事有制曰平

稱物以施不任意

布綱治紀曰平

法度皆理

由義而濟曰景

以義成事

耆意大慮曰景

耆強也

布義行剛曰景

守義不屈

彌年壽考曰胡

久也

保民耆艾曰胡

能壽也

追補前過曰剛

惟剛德能補過貪編有強毅杲敢曰

剛

彊又執正曰威 義勇無邪又又作毅

強以剛果曰威 強甚於剛會編作猛以強果曰威

清白守節曰貞 行無虧節無失

大慮克就曰貞 以天下爲度而能成其功

不隱無屈曰貞 坦然無私無屈會編作無私

治典不殺曰所 秉常不衰祈一云祁會編無

治民克盡曰使 嚴督無私

好和不爭曰安 與人無競

道德純一曰思 精粹不襍按會編有辟土蕪國曰思

大省兆民曰思 心常在民

外內思索曰思慮周於人已

追悔前過曰思思而能改

行見中外曰慤表裏如一

辟土服遠曰桓以威正人

克敬勤民曰桓敬以使民一云動民

辟土蕪國曰桓蕪并也

能思辯衆曰元別之使各有次

行義說民曰元民悅其義

始建國都曰元非善之長何以始之

主義行德曰元以義爲主而行德政

聖善周聞曰宣周聞謂廣文也

兵甲亟作曰莊 以數征爲嚴

敵圍克服曰莊 通邊圉使能服

勝敵志強曰莊 不撓故勝

死于原野曰莊 非嚴何以死難

屢征殺伐曰莊 以嚴釐之

武而不遂曰莊 武能持重

柔質慈民曰惠 心性慈祥

愛民好與曰惠 好於施予會編有柔質受諫曰惠

夙夜警戒曰敬 心存警惕按會編有夙夜恭事曰敬

與象方益平曰敬

善合法典曰敬 不敢違法 史記作合善典法

狀古述今日譽 立言之稱

昭功寧民曰商 有安民之功

克殺秉政曰夷 傷民不任賢

安心好靜曰夷 不妄動

慈仁短折曰懷 短未六十折未二十

述義不克曰丁 不能成義按會編有述義不弟曰丁

有功安民曰烈 以武立功

秉德遵業曰烈 會編無

剛克爲伐曰烈 伐功也

思慮深遠曰翼 小心

剛德克就曰肅 成其敬使令終

誠心決斷曰肅 嚴果

外內貞復曰白 外內皆正終而復始

不生其國曰聲 生于外家

未寧短折曰殤 未娶

短折不成曰殤 有知而夭

愛民好治曰戴

典禮不愆曰戴

不勤成名曰靈 任本性不見賢思齊

死而志成曰靈 能成其志

死見神能曰靈 鬼不爲厲

亂而不損曰靈 不能以治損亂

好祭鬼惟曰靈 黷于淫祀會編無

極知鬼事曰靈 知通幽微

遠拂不成曰隱 有才不得盡施

不顯尸國曰隱 以闇主國

見美堅長曰隱 不言而美自著堅且久也

官人應實曰知 以實求賢

殺戮無辜曰厲

戾服遂過曰刺 不受人言不改已非

不思忘愛曰刺 忘其愛已者

肆行勞祀曰悼 淫祀勞民

恐懼徙處曰悼 處艱難之時常懷恐懼

年中早天曰悼 年不稱志

早孤短折曰哀

恭仁短折曰哀

好變動民曰躁 不能安靜

不悔前過曰戾 乖戾反常

怙威肆行曰醜

壅遏不通曰幽 暗也

早孤墮位曰幽 即位而卒

動察亂常曰幽 易神之班不明也一云動靜

外內縱亂曰荒 家不正國不理

好樂怠政曰荒

凶年無谷曰荒 不務耕稼

在國遭憂曰愍 國多大喪

在國遭艱曰愍 兵寇之事一云逢難

禍亂方作曰愍

使民悲傷曰愍 遭遇可傷

質柔受諫曰慧 以虛受人一云柔質

貞心大度曰匡 心正量弘

名實不爽曰質

德正應和曰莫 正其德應其和

溫良好樂曰良 其人可好可樂

勤政無私曰類 無私惟義所在一云施勤無私

慈和徧服曰順 能以慈和使人皆服

思慮果遠曰明 不惑于疑不蔽于近

博聞多能曰憲 有學有才

嗇于賜予曰愛 貪吝

滿志多窮曰惑 滿以招損其心不明

危身奉上曰忠 險不避難

思慮不爽曰厚 不差所思其功必多

克威捷行曰威 有威而敏行

克威惠禮曰類 威而順理

去禮遠衆曰湯 不孚禮不親民

好內遠禮曰楊 淫不守正遠禮會編作怠政

內外賓服曰正 能以衆正

肇敏行成曰直 始疾行成言無所撓沮

彰義掩過曰堅 彰人善掩人過堅固人也

䟽遠繼位曰紹 非次得之

華言無實曰夸

好廉自克曰節 不侈情欲

逆天虐民曰抗

好更改舊曰易 變故改常

名與實爽曰繆

愛民任刑曰克 愛民而齊之以法一作克

擇善而從曰比 親比于善

除殘去害曰湯

史記不載會編續載

容儀恭美曰勝

勝敵壯志曰勇

既過能改曰共

凶年無穀曰糠

糠虛也

思慮深遠曰桀

怠政交外曰攜

喪國心慙曰赧

蔡邕獨斷帝謚

違拂不成曰隱

靖民則法曰黃

翼善傳聖曰堯

仁聖盛明曰舜

殘人多壘曰桀

又曰多殺曰

殘義損善曰紂

慈惠愛親曰孝

愛民好與曰惠

聖善周文曰宣

聲聞宣遠曰昭

剋定禍亂曰武

聰明睿智曰獻

溫柔聖善曰懿

布德執義曰穆

仁義說民曰元

安仁立政曰神

布綱治紀曰平

亂而不損曰靈

保民耆艾曰明

辟土有德曰襄

貞心大度曰匡

大慮慈民曰定

知過能改曰恭

不生其國曰聲

一德不懈曰簡

夙興夜寐曰敬

清白自守曰貞

柔德好衆曰靖

安樂治民曰康

小心畏忌曰僖

中身早折曰悼

慈仁和民曰順

好勇致力曰莊

恭仁短折曰哀

在國逢難曰愍

名實過爽曰繆

雍遏不通曰幽

暴虐無親曰厲又曰殺戮無辜

致志大圖曰景

辟土兼國曰桓

經緯天地曰文

執義揚善曰懷

短折不成曰殤

去禮遠衆曰煬

怠政外交曰攜

治典不敷曰祈

北魏元修謚議

除僞寧直曰武

此釋義古不載修議引以謚于忠者

耶亦有據

隋謚

闇 此謚古不載隋文帝以謚斛斯徵宜補入下謚

張星謚議

好功自是曰專 此謚古不載唐臣星引以請謚宋慶

禮恐必有據

張瓌謚議

貪而敗官曰墨 此謚古無釋義唐張瓌引以請謚錢

惟演宜存備考

蘇洵謚法釋義

文 經天緯地 勤學好問 修德來遠 慈惠愛民

忠信接禮 愍民惠禮 道德博問 錫民爵位

剛柔相濟 修治班制 敏而好學 施而中禮
武 克定戡亂 剛強直禮 保大定功 夸志多窮
威強敵德 剛強以順 闢土斥境 折衝禦侮
刑民克服

成 禮樂明具 安民立政 持盈守滿 遂物之美
通遠強立

康 撫民安樂 淵源流通 溫良好樂 令民安樂

獻 聰明肅智 嚮忠內德 智質自操

懿 柔克有光 溫柔聖善

元 體仁長民 行義說民 始建國都 道德純一

思能辨衆 立義行德

章 法度大明 敬慎高明 出言有文

景 着意大圖 由義而濟 布義行剛

宣 施而不私 聖善周聞 善聞周達 誠意見外

明 照臨四海 任賢致遠 招集殊異 獨見先識

諧 恕不行 能揚側陋 察色見情

昭 明德有功 容儀恭美 聖聞周達 昭德有勞

聖問達道

正 內外賓服

恭 卑以自牧 尊賢貴義 敬順事上 不懈爲德

尊賢敬讓 執事堅固 治典不易 愛民悌長

執禮御賓 貢難于君 庇親之闕 尊賢讓美

既過能改 正德美俗

莊 嚴敬臨民 威而不猛 履正志和

憲 賞善罰惡 博聞多能 行善可紀

敏 應事有功

端 守禮執義

介 執一不遷

通 物至能應 事起而辨

靖 寬樂令終 恭已鮮言

賢 行義合道 明德有誠

孝 慈惠愛敬 能養能恭 繼志成事 協時肇享

幹蠱用譽 秉德不回 五宗安之 大慮行節

忠 盛衰純固 危身奉上 臨患不忘國

推賢盡忠 廉方公正

惠 愛民好與 柔質慈民 柔質受諫 勤施無私

和 柔遠能邇 號令民悅 不剛不柔 推賢讓能

安 好和不爭 兆民寧賴

質 名實不爽 忠正無邪

烈 安民有功 秉德遵業

威 賞勸刑懲 猛以剛果 以責服遠 強毅執正

勇 率義共用

義 制事合宜 見義能終 先君後已 取而不貪

除去天地之害

剛 強毅果敢 追補前過 致果殺敵 強而能斷
壯 勝敵克亂 共圍克服 死于原野 武而不遂

屢征殺伐

節 好廉自克 謹行制度

襄 闢土有德 因事有功 甲冑有勞

愍 在國逢難

勤 能修其官

溫 德性寬和

良 中心敬事 溫良好樂

密 追補前過

榮 寵祿光大

服 慈和徧服 和比于理

僖 小心畏忌

釐 質淵受諫

純 中正精粹

修 勤其世業 好學近智

恪 敬共官次 威容端嚴 溫恭朝夕

敦 溫仁忠厚 善行不怠 能記國善

思 追悔前過 大省兆民 謀慮不僭 外內思索

念終如始

容 寬裕溫柔

肅 剛德克就 執心決斷 正已攝下

穆 布德執義 中情見貌

清 避遠不義

定 安民大慮 純行不爽 大慮慈仁 安民法古

簡 治典不殺 平易不訾 正直無邪 一德不懈

毅 致果殺敵 強而能斷

謚法下文三十五言

友 睦于兄弟

禮 奉義順則 恭儉莊敬

達 質直好善 疏中通理

懷 慈仁短折 執義拘善 失位而死

理 才敏審諦

裕 強學好問

素 達禮蔽樂

翼 思慮深遠 愛民

潔 不污不義

齊 執心克莊

隱 違拂不成 不顯尸國 懷情不盡

確 執德不惑

顯 行見中外

果 好力致勇

平 治而無青 執事有制 布綱治紀

悼 肆行勞祀 未中早天 恐懼徙處

慙 以德受官 以功受賞

信 守命共時 出言可復

靈 亂而不損 不勤成名 死見神能 好祭鬼神

極知鬼神

易 好更故舊

虛 涼德薄禮 華言無實

愿 敗亂百度 忘德敗禮 柔無立志

縱 弱而立志

厲 殺戮無辜

刺 狠愎遂過 不思妄受

荒 外內縱亂 好樂怠政

躁 好變動民

戾 不悔前過

醜 怙威肆行

幽 壅遏不通 早孤隕位 動察亂常

愛 嗇于賜予

煬 好內違禮 好內怠政 去禮遠正 違天虐民

携 怠政外交

夸 華言無實

繆 名與實爽

鄭夾漈謚法并雜論

神聖賢文武成康獻懿元章

瞻景宜明昭正敬恭莊肅穆
戴翼襄烈桓威勇毅克壯圉
魏安定簡貞節白匡質靖真
順思考高顯和玄高光大英
睿博憲堅孝忠惠德仁智慎
禮義周敏信達寬理凱清直
欽益良度類基慈齊深溫讓
密厚純勤謙友祁廣淑險靈
榮厲比潔舒貴益退訥僊述
懋宜哲察通儀經庇協端休
悅綽容確恒熙洽紹世果

右上謚百三十一用之君親用之君子

懷悼愍慙作哀隱幽冲夷懼息

携卹愿傲

右中謚十四用之閔傷用之無後

野夸躁伐荒煬戾刺虛蕩墨

憊亢干褊專輕苛介暴虐悞

悖凶慢忍毒惡殘曩攘頑昏

驕醜湏僥狙倭惑靡溺偽妄

譎諂誣詐譎訕詭姦邪慝蠱

危圯懦撓覆敗戮疵褻費

右下謚六十五用之殲夷用之小人

鄭夾漈曰天下有難行之道雖曰古有是道而後世終不可行者非古有是道也後之人設是道以實之耳豈有可行於古而不可行於今之道乎若曰臣子可以議君父之得失使有德則謚善無德則謚惡大行受大名細行受細名行生於已名生於人此真不可行之道也自非伐無道誅有罪收其鯨鯢以為京觀則安得有惡謚之稱乎臣以為立謚之意本為昭穆命謚之義取於尊隆且生有惡死無惡者人之情也生可簡死不可簡者禮之事也生雖侯伯死必稱公生不踰等死必加等先王之通制也豈有稱生之號有隆而命死之名有虧乎謚亦有惡惡謚非所以加君父也子曰父在觀其志

父沒觀其行三年無改於父之道可謂孝矣不若是是不當於人心子議父臣議君秦人之所厭而削之也今先儒之所謂謚者正秦人之論耳不合于古道

又曰謚法惡謚莫如桀紂其次莫如桓靈其次莫如幽厲此古今之所聞也以臣所見皆不然桀紂是名耳非謚也名者生之所命而非死之所加也當夏之季當殷之興則未有謚桀非謚也當殷之季當周之興雖有謚法然謚爲榮不得謚爲辱名之以紂辱莫大焉桀之所名者取於木猶高柴公孫枝之所取云爾豈有殘人多殺之名而可以爲名乎紂之所名者取於絲猶臧紇南宮縚之所取云爾豈有殘義損善之名而可以爲名

乎是名也非己之所更即父兄之所命也安得有是義乎桓於經典並無惡義如公執桓圭桓乃圭璋之首稱如桓桓武王桓乃果毅之盛德齊之桓公用能霸業周之桓王元無累行安得桓為惡名乎靈者神聖之異名周之東也王綱不振四方解體迨乎靈王周道始昌諸侯服從故傳曰惟有髭王甚神聖以其生有神聖之德死則謚之以靈是為名實允當其曰請為靈若厲者荆蠻不根之論也安得靈為惡名乎幽者隱之並名也周幽王喪於犬戎之禍魯隱公卒於羽父之難皆臣子所不忍言故以幽隱命之痛惻之甚也豈有雍遏不通之義乎語曰子溫而厲威而不猛恭而安厲與安並德故

於厲言而猛則異於是故於猛言不厲非惡也豈有暴
害無親之義乎厲王過矣使厲王而有暴害無親之名
則宣王不得爲孝子幽王過矣使幽王而受壅遏不通
之責則晉文侯鄭武公不得爲良臣成周之法初無惡
謚謚之有惡者後人之所立也由美刺之說行然後人
立惡謚

又曰法之爲謚者取一文耳非有他說也謚法行其說
紛紛矣書見于世者有周公謚法有春秋謚法有廣謚
有今文尚書有大戴記有世本有篇斷有劉熙之書有
來輿之書有沈約之書有賀琛之書有王彥威之書有
蘇冕之書有扈蒙之書有蘇河之書其實皆由漢魏以

米儒生取古人之書而釋以已說集而爲法也故蘇洵
曰周公之法反取賀琛之新法載之書是知世之謚法
名爲古者實非古也今考周公之書所用後人之語甚
多是皆爲謚法者展轉相因言文雜採無足取也惟沈
約之書博采古今諡次有紀然亦無所建明至蘇氏承
詔編定六家謚法乃取周公春秋廣謚沈約賀琛扈蒙
之書斷然有所去取其善惡有一定之論實前人所不
及也皇也帝也王也公也侯也君也師也長也胥也實
尊卑之號上下之稱且生有爵死有謚以是爲謚未之
敢聞也若皇帝可以爲謚則天子亦可以爲謚矣若公
侯可以爲謚則卿大夫亦可以爲謚矣若師長可以爲

謚則父兄亦可以爲謚矣無義之談莫此爲甚經幾百年間而後蘇子闢之堯取壘土以命名舜取稷華以命名禹取干獸湯取于水桀以喬木紂以繹絲是非已之所更必父兄之所命也且生有爵死有謚以是爲謚未之前聞也蘇氏未暇及臣不敢後焉謹條其可用者二百十謚分爲三類只以一文見義無事平文之廣無事乎說之繁庶乎表裏蘇氏之學是亦典禮之大者

又曰凡蘇氏所取一百六十八謚三百十一條臣今只卽一文以見義卽文可以見文不必曰施而中理曰文經緯天地曰文卽武可以見武不必曰克定禍亂曰武保大定功曰武卽孝可以見孝不必曰慈惠愛親曰孝

能養能恭曰孝即忠可以見忠不必曰盛衰純固曰忠
臨患不忘曰忠且即文以見義則文簡而義顯舍文而
從說則說多而義惑蘇氏所削爲多矣今復削去三百
十一條之說只從百六十八謚而損增焉實得二百十
謚分而爲三上謚百三十一用于君親用于君子下謚
六十五用于殲夷用于非君子中謚十四用于閔傷用
于無後者其有堯舜禹湯桀紂六文乃人名非謚法所
宜去也陳胡公滿者言其老也有胡考之稱焉胡非謚
義齊有丁公名也漢有丁公姓也丁非謚義故去胡去
丁曰商曰使曰軍曰趨曰辟曰莫曰敵曰震曰懼曰革
曰易曰素曰頃凡十三文雖有其謚於辭義未安故宜

去也曰原曰愛曰聲曰聞曰要曰強曰平凡七文文雖
可用于義不專亦宜去蘇氏所取者百六十八謚今去
其二十八謚蘇氏所去者百九十八謚今取其七十二
謚披沙得金甄金去土非相違也而相從也

又曰蘇氏去其歷代所以爲尊卑之號者九皇帝王公
侯君師長胥是也子曰左丘明耻之丘亦耻之蘇氏去
其義之不安者八今取其貴取其逸所以待丘園也蘇
氏去其子孫不忍稱者九十四今取其暴取其害取其
悞取其凶取其悖取其慢取其忍取其惡取其毒取其
曷取其攘取其頑所以待暴戾取其昏取其驕取其醜
取其涵取其僥取其狙取其侈取其惑取其靡取其溺

所以待遷後取其諂取其僞取其譎取其妄取其誣取其詐取其諂取其訕取其詭取其奸取其邪取其慝取其蠱所以待奸回取其危取其圯取其撓取其覆取其敗取其牧所以待其亡取其懦取其疵取其穢所以待貪鄙蘇氏去其名之不能舉其人之要者八今取其退取其訥所以待恬退之士取其修取其訓所以待禮法之人蘇氏去其鄙陋不足以訓者十有一今取其僇取其速爲靖專者備也蘇氏去其泛濫不可指名善惡之狀者七今取其懋爲黽勉者備也取其宜爲中庸者備也蘇氏去其重復而無益於用者五十七今取其哲有異于智也取其察有異于明也取其通有異于敏也取

其儀有異于穆也取其經有異于憲也取其協有異于
順也取其端有異于直也取其費有異于誇也取其休
取其悅有異于凱也取其綽取其容有異于寬也取其
確取其恒有異于介也取其熙取其洽有異于和也又
曰蘇氏于百六十八謚之外有七去三百十一條之中
有六類七去者削其文六類者易其義臣今此書只用
文顯不可義說故于六類亦無所用但第四類中比儉
二義于文未安不得不爲之說儉乃恭儉之儉比乃協
比之比儉也比也古之美謚也蘇氏引儉則固之義而
比之曰非薄廢禮曰儉引君子周而不比之義而更之
曰事君有黨曰比以比儉二謚內于惡德此臣之所不

景 耆意大圖 由義而濟 布義行剛

宣 施而不私 善聞周達 誠意見外 聖善周聞

明 照臨四方 任賢致遠 獨見先識 諸愬不行

察色見情 招集殊異

昭 明德有功 聖聞昭達 容儀恭美 照德有勞

正 內外賓服

恭 卑以自牧 尊賢貴義 不懈爲德 敬事供上

愛民弟長 執禮御賓 尊賢讓善 執事堅固

敬順事上 正德美容 既過能改

莊 嚴敬臨民 威而不猛 履正志和

肅 剛德克就 執心決斷 正已攝下

穆 布德執義 中情見貌

清 避遠不義

定 安民大慮 安民法古 純行不爽

簡 治典不殺 平易不訾 正直無邪 一德不懈

憲 賞善罰奸 博聞多能 行善可紀

敏 應事有功 元劉致議蕭刺謚云好古不怠曰敏

端 守禮執義

敬 夙夜儆戒 夙興恭事 合善典法

介 執一不遷

裕 強學好問

通 物至能應 事起而辨

白 外內貞復

靖 寬樂令終 恭已鮮言 柔德安衆

元虞集議陳文靖謚曰仕不躁進曰靖

賢 行義合道 明德有成

貞 清白守節 大慮克就 不隱無屈

孝 慈惠愛親 五宗安之 大慮行節 能養能恭

繼志成事 協時肇享 秉德不回 幹蠱用譽

忠 盛衰純固 危身奉上 推能盡忠 廣方公正

臨患不忘國

惠 愛民好與 柔質慈民 施勤無私

和 柔克有光 不剛不柔 號令民悅 推賢讓能

安 和好不爭 兆民寧賴

質 名實不爽 忠正無邪

靜 柔德教衆

烈 安民有功 秉德尊業

禮 奉義順則 恭儉莊敬

威 賞勸刑懲 以刑服遠 猛以彊果 強義執正

勇 率意共用 又云臨難不懼

義 制事合宜 見義能忠 先君後已 取而不貪

除去天地之害

剛 強義果敢 追補前過 致果殺敵 強而能斷

壯 勝敵志強 敵圍見服 死於原野 兵甲亟作

履征殺伐 武而不遂

怨 表裏如一

潔 不污不義

節 好廉自克 謹行制度

襄 闢地有德 甲冑有勞 因事有功

愍 在國逢難

良 小心敬事 溫良好樂

勤 能修其官

密 追補前過

溫 德性寬和

榮 寵祿光大

順 慈和徧服 和比於理

慈仁和民

僖 小心畏忌 無過爲僖

質淵受諫

小心恭慎

純 中正和粹

果 好力致勇 好學近智

修 勤其世業

顯 行見中外

恪 敬共官次 威容端嚴

溫恭朝夕

毅 善行不怠 溫仁忠厚

能紀國善

思 追悔前過 念終如始

謀慮不僭

外內思索

容 寬裕溫柔

懷 慈仁短折 失位而死

隱 懷情不盡 違拂不成

桓 辟土服遠 充敬動民 辟土兼國

慧 質柔受諫

已上六十八字見于類鈔者似亦未詳姑依原稿錄之簡覽有文無義者并載于後

寧 國初謚中山王謚法未載或 太祖取不殺之義

慎 成化中謚夫人韓氏曰恭慎

冲 嘉靖中謚 皇太子曰哀冲或取冲年之義

淑 嘉靖中謚康妃杜氏曰榮淑

善 弘治中謚夫人項氏曰榮善

崇 洪武初謚合浦侯陳清曰崇武弘治中謚夫人胡

氏曰崇善夫人姚氏曰崇敬弇州稿以爲能修其官曰
崇不知何所考據

續文獻通考卷之一百三十四終